



Rabu, 31 Maret 2021
Ogen: 1 Johanes 4:19-20



Ise Si Man Kelengen Dibata



Ise kin sutuhuna si ku kelengi tupung ningku aku engkelengi Dibata? Enda banci jadi penungkenen man pribadinta sekalak-sekalak, i bas wari perpudi bulan Maret enda. Situhuna, labo kita ngasup engkelengi Dibata, sabab alu matanta jine labo kita ngasup ngidah IA. Uga ninta engkelengi si la siidah? Jesus jine erbelas, tupung icidahkenndu kekelengenndu man temanndu si kitikna kal, Aku kap siikelengindu e. Kepeken tupung kita engkelengi temanta manusia, i je kita enggo engkelengi Dibata.

I bas renungenta enda ipersingeti kita tole kerna engkelengi senina. Kita engkelengi sebab leben IA engkelengi kita. Ise si engkelengi Dibata arus maka ikelengina pe seninana. Lit telu tingkatan senina si igambarkan arah renungenta enda ; si pemena, senina erkiteken hubungan dareh (sada nande-sada bapa, senina sembuyak bapa entah senina sembuyak nande) ertina si lit denga hubungan darehta ras ia. sipeduaken, Senina erkiteken sada dareh ras Kristus. Dareh Jesus si enggo nebusi kita ras teman sada kiniteken, janah iangkatNa kita jadi anak-anakna, emaka kita kerina enggo ersenina. Sipeteluken, Senina erkiteken kita radu ras tinepa Dibata si meherga, amin pe la kita sada kiniteken tapi kerina manusia e sesama man banta.

Engkelengi sesama, enda me bukti nyata kita engkelengi Dibata. Si benaken i bas ruang lingkup si kitik nari eme senina erkiteken dareh. Ertina i bas keluarga nari tetap si tuduhkan kekelengenta, sisampat-sampaten dengen si alamen salah. Arah keluarga reh mbarna keleng ateta seh ku teman sada kiniteken, erturang ersenina i bas Tuhan. La sipandang punjuten, la si dalih-dalihen kerina kita si keleng-kelengen. Ermediate kita nandangi kecibal kegeluhen seninanta, nggit mereken penampat encukupi keperluan geluhna. Kenca si e terdauhen si kelengi temanta si radu ras kita tading i doni enda. Subuk ia korban erupsi, korban banjir, korban gempa, entah korban pinakit social. Kalak si lit ipenjara entah si lit irumah sakit, si lit i panti asuhen, panti jompo ras disabilitas. Perlu jadi perenungen, megati Dibata hadir arah kalak musil isekelewetta. Si tulak entah si sampati ia em perbahanenta man Dibata. Adi sigejapken kita ersenina ula metangkang nampati ras nehken kekelengen, sabab ibas kita engkelengi eme buah kinitekenta.